

Seroe Colorado traspasa pa Gobierno



ORANJESTAD (IPA-AC) Ayera mainta a tuma lugar e acto ceremonial di traspaso di e tereno di Lago Seroe Colorado pa Gobierno di Aruba, acto cual a tuma lugar na e porta di Lago cu ta bai pa Colony.

Tabata presente na e ocasion aki Promer Ministro Nelson Oduber, Ministro Ing. Edison Briesen, Ministro Elio Nicolaas, Ministro Hendrik Croes representante di Exxon na Aruba sr. Henry Coffie.

Na e ocasion aki a dirigi palabra Promer Ministro di Aruba sr. Nelson Oduber kende a bisa cu den number di Gobierno e kier a felicita henter e comunidad Arubano riba e dia special di 1 Mei cu rond mundo obhronan y tur hende cu ta

contribuyendo na progreso di nan respectivo paisnan ta celebra dia di obrero.

Premier Oduber e anja aki por duna e dia un toque special, pasobra ta un momento historico caminda por ehempel na otro paisnan nan a basha muraya abao pa motibo di ideologia.

"Aki na Aruba nos a bin awe mainta pa kita locual boso ta mira nos dilanti, cu a wordo considera pa hopi arubiano psicologicamente hopi anja como un barera pa dreña un area special.

Mi tabatin e honor diadomingo siman pasa di ricibi e promer ehemplar di un buki scirbi pa un arubano.

Un di e promer senjoranan cu a bai den politica na Aruba, sr. Laura Wernet

Paskel.

Den e buki ta poni cu si su mayornan kier keiro, anto nan ta bai rond Aruba y nan ta yega te aki y mi a tende sr. Prits Maduro yama e lugar aki costa.

Correctamente den e buki ey, e ta wordo yama costa.

Pero nos no por a drenta paden, pasobra e ta di e mericanonan, te e muraya nos a yega.

Wel awe, nos no a yega te na e muraya.

Nos a bini pa pueblo por haci uso di un facilidad na un manera responsabel, cu a ser cuida pa mas cu 67 anja pa Exxon su filial Lago na Aruba na un manera responsabel.

Manera conoci na



1985, e refinaria a sera, y di e tempo ey e gobiernonan a delibera pa yega cu Exxon pa mira pa yega na un entendimiento riba e traspaso di nada menos cu 4 miyon meter cuadra di tereno cu nan tin den erfpacht y tambe mas o menos 320 mil meter cuadra di tereno cu ta propiedad di Lago cu nan a compra di diferente famianan aki na Aruba.

Nos a pasa den un proceso dificuloso y na 1989, despues cu e refinaria tabata wordo corta na pida pida, nos acepta e reto di mira cu berdaderamente nos por pone nos solamente, sende e candela pa kima e petroleo y traha derivadonan di e petroleo crudo aki na Aruba atrobe.

Duna Aruba un bida, muy en especial e parti di nos pueblo na San Nicolas y dia 20 di april 1991, Arubatabata testigo di un realidad cu Aruba atrobe tin un refinaria di 150 mil baril y un inversion di 300 miyon Dollar mericano.

E premier a enfatisa cu tin sigur cu e area cu a sufrí mas hopi despues di sierra di e refinaria ta e parti di San Nicolas y vecindario y e ta kere cu un y tur por ta orgulloso, despues cu Gobierno a contribui financieramente despues cu e Centro di Barlo Lago Heights a kima pa construi e completamente di nobo.

Na anja 1990 Gobierno a percura pa re-apertura di e terminal, 20 di

April 1991 Gobierno a percura pa re-apertura di e refinaria y industrianan chiquito na San Nicolas.

"Awe 1 mei 1992 nos Gobierno cu boso apoyo a percura pa wordo debolbi na nos pueblo local un y tur por mira y na cual ocasion mi ta considera historico.

Hopi di bosoian por a lesa di sumanan grandi cu tabatin y cu pueblo a perde di haya.

Awor mi kier bisa como gobernante, si un hende a sinta tres anja den Gobierno y ela mira un suma asina grandi cu e por a haya, con bin bo a laga di hay'e anto, con bin bo a largue pa otro, pa ricibi e suma ey?

E inteligencia di nos pueblo sa bon, cu nos ta maneha situacion responsable na un manera realistico y cu despues cu nos a negosha cu Lago, no tabatin discusionnan cu asunto di belasting.

Un dado momento nos no a haya razon, ariba un suma di casi 50 miyon florin y despues cu nos a ripara cu nos por keda discuti te anja 2000, nos a bisa cu lo ta bon pa Lago y Gobierno.

Lago tabata un bon cuidadano semper aki na Aruba y asumi su responsabilidad como hendenan responsable cu tin di defende nos pueblo, pasobra manera sr. Henry Coffie a bisa mi, semper ora ami cun'e pleita un poco, e ta bisa, hey Nel ta arubiano mi ta.

Mi ta contento cu e junto cu nos pasobra ela bisami cu e ta keda akinan.

Y esey ami ta considera semper e aspecto positivo cu e no portin ningun intencion cu no ta bon pa su pueblo.

Premier Nelson Oduber a termina bisando cu pa e

recreacion, e diverticion e recreacion di e area aki pa esnan cu ta interesa, na un manera responsabel usele pa e meta ey y di e forma ey.

Ademas lo mas pronto cu ta posibel e tereno aki su uso lo ta na e efectividad.

"Awe mainta un biaha mas, mi kier a reitera mi palabra di graditud na nos pueblo cu a duna nos e oportunidad awe mainta

efectua e acto historico aki.

Y manera mi a bisa semper, nos ta orgulloso di ta yiu di e tera aki, pasobra awe nos como yiu di e tera aki a percura pa debolbe na nos pueblo, local semper nos a considera cu ta parti di Aruba.

Y desde awe, Aruba ta totalmente di Punta Bassora te West un lugar caminda nos por cana, sin ningun restriccion.



ORANJESTAD (IPA) Grandi ta momento historico cu nos afamado politiconan arubano ayera mainta a "pose" pa fotografonan saca un foto junto cu un borchi, cu ta indica cu tur hende no ta bon bini mas na Seroe Colorado, pero si ta BON BINI NA "SEROE COLORADO. Ki hilaridad esaki ta y ainda por weita expresion di duna ariba cara di e Ministro di Justicia. Ha ha ha....